



## SAOPĆENJE ZA JAVNOST

### **Podmetanje požara na vozilu skupštinskog zastupnika Nedeljko Trifković osuđen na zatvorsku kaznu**

Tužilaštvo Brčko distrikta BiH okončalo je postupak protiv Nedeljka Trifkovića (20)\*, optuženog da je prošle godine u Brčkom podmetanjem požara na automobilu Uroša Vojnovića izazvao opasnost po imovinu većeg obima. Nakon zaključenja sporazuma o priznanju krivice s Tužilaštvom, Trifković je za krivično djelo izazivanja opće opasnosti osuđen na mjesec i 15 dana zatvora.

Tužilaštvo Distrikta optužilo je Trifkovića da je 29. maja prošle godine oko 02.00 sata podmetnuo požar na automobilu zastupnika u Skupštini Brčko distrikta BiH Uroša Vojnovića. On je držeći u ruci plastičnu flašu napunjenu benzinom prišao vozilu parkiranom ispred dvorišta porodične kuće oštećenog, a zatim posipanjem ove zapaljive tečnosti i otvorenim plamenom izazvao požar koji je potpuno uništio automobil. Pošto je ubrzo uhapšen i stavljen u pritvor, istraga Tužilaštva i Policije Distrikta okončana je 14. oktobra, kada je Tužilaštvo protiv njega podiglo optužnicu za krivično djelo Izazivanje opće opasnosti (*iz člana 317 stav 1 Krivičnog zakona Brčko distrikta BiH*). U postupku pred Osnovnim sudom Distrikta, Tužilaštvo i optuženi nedavno su zaključili sporazum o priznanju krivice, u skladu s kojim je Trifković osuđen na kaznu zatvora od jednog mjeseca i 15 dana. Izuzev odluke o krivičnopravnoj sankciji, optuženi presudu može pobijati žalбом pred Apelacionim sudom distrikta Brčko.

Uz ovaj, pred sudom su gotovo istovremeno pokrenuti postupci i za nekoliko povezanih slučajeva izazivanja opće opasnosti koji su se u ovom gradu, u kratkom vremenskom razmaku, dogodili sredinom prošle godine. Postupak po optužnici protiv Nikole Kokanovića\*, za koga se sumnja da je od Trifkovića za novac tražio da podmetne požar na vozilu Vojnovića, u fazi je glavnog pretresa. Usto, Kokanović je optužen i zbog izazivanja požara kojeg je 15. jula na još jednom automobilu podmetnuo maloljetni N. M. (17), te zbog bacanja eksplozivne naprave 17. avgusta na ugostiteljski objekat *Dos Manos*, od strane iste osobe. Nakon dovođenja u vezu s ovim slučajevima, Kokanović se od 27. avgusta prošle godine nalazi u pritvoru, a trajanje ove mjere nedavno mu je ponovo produženo do 24. maja. S druge strane, postupak prema maloljetnom N. M. u međuvremenu je pravosnažno okončan izricanjem vaspitne mjere.

\*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

**Tužilaštvo Brčko distrikta Bosne i Hercegovine 6.5.2022. godine**

**GLAVNI TUŽILAC  
ZEKERIJA MUJKANović**